

水經

聖

七
228
827.5



各處河堤皆注明坐落某處惟考城縣第二段無之幸於底

本中

查示

無有



上諭

御製箴

御製詩

卷之二



皇帝勅諭兵部尚書兼都察院右都御史總督河道提督軍務張
鵬翮茲以總河關漕運大計特命爾總督河道提督軍務駐劄
濟寧州凡山東曹濮臨沂州河南睢陳直隸大名天津江南
淮揚徐賴各該地方俱照舊督理爾督率守巡河道等官將各
該地方新舊漕河及河南山東等處上源往來經理遇有淺澀
衝決堤岸單薄應該幫築挑濬者皆先事預圖免致淤塞有礙
運道合用人夫照常於河道項下附近有司軍衛衙門調取應
用其各省直歲修河工錢糧但係河道工程俱照近日新行事
例通融計處支放務要規畫停當毋得糜費若所屬大小官員

果能盡心河務即據實舉薦有侵漁溺職怠玩誤事及權豪勢要之家侵占阻截並違例盜取河防應拏問者竟行拏問應叅奏者指名叅奏其河道緊要機宜有干漕運督撫衙門會同計議施行若有重大事情奏請定奪年終將修理過河道人夫錢糧照例備細造冊圖畫貼說奏繳或有土賊不時竊發慮河運為梗爾尚精選將領嚴覈兵馬勤加訓練申明紀律如遇賊寇窺犯即督發鎮將官兵勦滅勿使蔓延如有將領臨陣退縮殺良冒功及糧運稽遲失誤軍機者武官自肆品以下文官自六品以下會同巡撫提督准以軍法從事鎮道等官飛章叅處務期消弭亂萌保安地方其山東河南各巡撫悉聽爾節制河道軍務有開載未盡者許以便宜舉行不從中制爾以才望簡用須殫竭忠猷不避勞怨斯稱委任毋或因循怠忽及處置乖方有負委托爾其勗之故諭

康熙叁拾玖年叁月拾肆日河道總督臣張鵬翮面奉

聖訓古人之法與今河勢不同其最緊要者黃河何以使之深清
水何以使之出爾詳加籌畫

康熙參拾玖年參月拾肆日河道總督臣張鵬翮恭聆

天語朕親書河工事宜貳條差筆帖式馬泰交與于成龍你到衙門查看就知河工流弊蚤已知有今日豈至今日而始言也欽此欽遵臣到清江浦詢筆帖式馬泰檢出

御書

上諭壹條由清字譯出係康熙參拾捌年柒月初三日

上諭諭河道總督于成龍畫河圖去的董殿邦等於柒月初叁日到來問你身上好麼伊說你臉色甚瘦如今你身上好了麼飲食如何再細觀河圖內要緊應修兩處今特諭在南方面諭你

將人字河芒稻河緊急挑挖等諭聞得至今未會動工若真未動工大有所失似此遲誤不但運河東堤難保關係民生最重如今若不緊緊挑寬伍陸拾丈使不得為此又專諭爾等又一件事看得河圖內歸仁堤便民間等口俱已堵塞毛城舖以下等口俱未堵塞將便民間等口堵塞毛城舖等口所出之水將歸何處必定散漫各處民大受害此處關係緊要宜速籌一策這貳事外各處工程修至何等光景將水勢情形緊急奏聞為此特諭等諭又一件據馬泰回稱

御書

上諭已繳有錄出原稿係康熙叁拾捌年叁月初柒日欽奉

上諭初陸日到清水潭九里等處測量水平看得河水與湖水相高貳尺叁寸玖分這一帶隔湖石堤關係緊要宜當速造朕在此處步行看工未見一箇做工之員著查明叅處至高郵等處河水向湖而流河水似高壹尺乘黃水未深通之前這些處堤工雖壹丈不可忽略不可不急速備做為此特諭

康熙叁拾玖年叁月拾柒日河道總督臣張鵬翮面奉

聖訓引湖水使之由人字河芒稻河入江朕所見最真爾必須要

行

康熙叁拾玖年叁月拾柒日河道總督臣張鵬翮面奉
聖訓將黃河曲處挑挖使直水流暢快則泥沙不淤

康熙叁拾玖年肆月貳拾伍日准工部咨為欽奉

上諭事都水清吏司案呈奉本部送工科抄出該本部等衙門會
覆兵部尚書范承勳等奏前事等因康熙叁拾玖年叁月貳
拾玖日奏肆月初捌日奉

旨九卿詹事科道會議具奏欽此欽遵該臣等會議得先經臣等
會議以時至桃汛其未堵高堰減水壩暫行停堵將高堰可
修之處乘時速行修築完工如桃汛水發有修築不及之處
停其修築將物料備辦秋汛水落即行修築完工如別有善
策將黃淮兩河並高堰堤工作何修治裨益運道民生之處

所去大臣河道官員公同詳議速行具奏等因具題奉

旨這本內事情著行文前往河工尚書范承勳等會同河道總督
這所議可否伊等意見又復何如之處速議具奏將董安國所
挑引河再行挑濬堵閉黃水倒灌清口之口或將清江閘堵閉
及查者修理更樓決口等工著侍郎常綬等前往省閱具奏

康熙叁拾玖年伍月拾貳日准戶部咨為題明事雲南清吏
司案呈工科抄出總漕桑格題前事康熙叁拾玖年貳月貳
拾肆日題叁月拾伍日奉

旨這邵伯更樓決口自去歲奏報後屢據奏稱僭工修築乃迄今
尚未報完以致漕艘拾有餘隻漂沒擊碎其阻滯江干及瓜揚
一帶地方不能前進者甚多遲誤漕運關係重大在工官員所
司何事怠緩延玩殊為可惡著嚴加議處具奏仍著該督設法
倍料兼工堵築刻期報完勿致再誤邵伯更樓係船隻往來要
地已經衝決拾箇月有餘船隻阻滯不能前進之處桑格竝不

題報至于成龍故後始行具題不合著一併察議具奏該部知道

康熙叁拾玖年伍月拾肆日接員外郎拖克拖和中書張古禮傳奉

上諭康熙叁拾玖年伍月初陸日大學士伊桑阿馬奇奉

上諭員外郎拖克拖和中書張古禮著馳驛前往河道總督張鵬翮處將修過河工情形閱看伊等無有專責將工程令河道總督張鵬翮明白繕寫摺子交與伊等帶來啟奏

康熙叁拾玖年陸月貳拾伍日接

欽差戶部員外郎拖克拖和齋捧

上諭內開康熙叁拾玖年陸月拾伍日

上諭諭大學士伊桑阿馬奇見在清口淤墊著差人往總河張鵬
翮處明年漕船行走有無遲誤至其漕糧裝載沙船可否從江
下海入黃河海口由中河行走此外有無另見之處議明具奏

康熙叁拾玖年柒月拾肆日准工部咨為敬陳治河條例仰
祈

聖裁以固河防事都水清吏司案呈奉本部送工科抄出該本部
等衙門會覆河道總督張鵬翮題前事等因康熙叁拾玖年
陸月拾柒日題本月叁拾日奉

旨覽奏條陳河工弊端詳悉切要極其周備著九卿詹事科道會
同速行確議具奏

康熙叁拾玖年捌月初肆日接筆帖式關住齋捧

上諭內開吏部科道行取官員事件於康熙叁拾玖年柒月貳拾

伍日大學士伊桑阿馬奇折本啓奏奉

旨見今遣人往張鵬翮處著將這次各省行取知縣職名抄出問

他此知縣內張鵬翮有曾經識認居官優為人好者著明白開
寫摺子即付遣去筆帖式關住齋回啓奏又河水情形各處工
程修理若何亦著明白開寫摺子並交與遣去筆帖式齋回啓
奏

康熙叁拾玖年玖月拾陸日准工部咨為欽奉

上諭事都水清吏司案呈奉本部送工科抄出該本部等衙門會
覆河道總督張鵬翮題前事等因康熙叁拾玖年玖月初陸
日奉

旨總河職任宜專這遣往督修高家堰范承勳等玖臣俱著撤回
其督修工程著交與總河張鵬翮餘依議

康熙叁拾玖年拾月初玖日准工部咨為欽奉

上諭事都水清吏司案呈奉本部送工科抄出該本部等衙門會

覆河道總督張鵬翮奏前事請修歸仁堤堤河工程等因康熙叁拾玖年玖月初拾日奏本月貳拾肆日奉

旨此事曾屢經面諭于成龍最為緊要乃于成龍性偏未行詳看遷延時日以至於今觀張鵬翮所奏甚為合理此事所關至要著九卿詹事科道會同速行詳議具奏趁今年黃河水小之時興工毋誤圖併發

康熙參拾玖年拾月拾貳日准戶部等部咨為欽奉

上諭事雲南清吏司案呈吏部郎中葉舒題前事等因康熙參拾
玖年玖月拾叁日面

奏奉

旨知道了摺子交與戶部欽此又康熙參拾玖年玖月貳拾伍日
奉

旨總督阿山將修理沙船之處具題前因運河難以行走欲由海
內運糧曾差官查看沙唬船隻總河張鵬翮既稱將運河淤墊
處再加疏濬來歲糧船不致有誤等語是糧船不必海運總河

張鵬翮又稱將沙船暫行取用此所查沙船俱給張鵬翮應用之處交與該部議欽此欽遵又康熙叁拾玖年玖月貳拾玖日繕寫摺子啓

奏本日奉

旨沙唬船水手應用什物見在俱有總河張鵬翮欲用若干著儘其取用將此船隻行文江南總督鎮江將軍委賢能官員押送應用勿致有誤餘依議

康熙叁拾玖年拾月貳拾日准工部咨為題明事都水清吏司案呈工科抄出河道總督張鵬翮題前事

欽部事件扣除勘河日期等因康熙叁拾玖年玖月拾叁日題拾月初伍日奉

旨張鵬翮前任江南江西總督朕南巡時任以事務見其料理明敏非遲誤案件之人這事情著照所題行該部知道

康熙叁拾玖年拾月貳拾壹日准工部咨為欽奉

上諭事都水清吏司案呈工科抄出河道總督張鵬翮題前事請

修中河等因康熙叁拾玖年玖月貳拾日題拾月初柒日奉

旨前于成龍奏稱將中河改移朕屢經諭其恐有未便今張鵬翮

所議中河事宜甚當著照所奏行該部知道

康熙叁拾玖年拾月貳拾壹日准工部咨為欽奉

上諭事都水清吏司案呈工科抄出河道總督張鵬翮疏稱武家

墩起至小黃莊止一帶舊石工樁朽石歌必另行修砌除撥
發錢糧等事案內撥過銀伍拾萬兩外尚有不足銀壹拾捌
萬陸千貳佰肆拾捌兩零應請撥給等因於康熙叁拾玖年
玖月拾柒日題拾月初玖日奉

旨這修築高堰不足銀兩著照該督所請速行撥給乘此冬令水
涸作速修築完工勿致遲誤該部知道

康熙肆拾年正月初陸日准工部咨為欽奉

上諭事都水清吏司案呈奉本部送工科抄出河道總督張鵬翮

題前事挑濬下河蝦鬚溝等河等因康熙叁拾玖年拾貳月
初貳日題本月貳拾日奉

旨這本內事情著照該督所題行該部知道

康熙肆拾年正月初陸日准工部咨為估計挑挖引河以資
保固事都水清吏司案呈奉本部送工科抄出河道總督張
鵬翮題前事估挑時家馬頭對岍韓家莊對岍引河工程等
因康熙叁拾玖年拾貳月初貳日題本月貳拾日奉

旨這本內事情著照該督所題行該部知道

康熙肆拾年貳月貳拾捌日准工部咨為河工底績可期罅漏尚宜蚤塞等事都水清吏司案呈奉本部送工科抄出該本部覆河道總督張鵬翮題前事等因康熙叁拾玖年拾貳月拾捌日題肆拾年正月貳拾伍日奉

旨該部議奏欽此欽遵於正月貳拾陸日抄出到部該臣等議得先經刑科給事中陳詵以自天妃閘至清江浦共有伍閘必復天妃閘以塞其罅然後淮水可出又新舊中河應多建閘必座重運來時節級啓閉重運過後勿令常開等因具題奉

旨這事情應否可行著總河張鵬翮速議具奏該部知道

康熙肆拾年叁月拾叁日接內閣中書殷德納捧

旨到臣內開康熙肆拾年叁月初伍日張鵬翮題請河員應照臺灣例用賠修錢糧應豁免等因據九卿會議不准行具題折奏奉

旨這本奴貯爾衙門著爾衙門能馳馬中書壹員前往張鵬翮處張鵬翮悉知河務何處作為第一險要工程何處作為其次險工何處作為歲修工程詳加分晰逐段開明再何處衝決應賠修何處衝決不應賠修之處一併定議具奏這本著差去中書帶來啟奏

康熙肆拾年肆月初叁日准禮部咨為准黃交會謹陳善後
貳策以昭法守事儀制清吏司案呈奉本部送禮科抄出該
本部會同吏部覆總河張鵬翮題前事康熙肆拾年正月貳
拾柒日題貳月拾伍日奉

旨該部議奏欽此欽遵於本月拾柒日到部該臣等會議得河道
總督張鵬翮疏稱

皇上叁閱河工區畫精詳請將治河

上諭與

宸斷治河事宜

勅下史館纂集成書更祈遴選進士舉人中年力英敏者發往河
工効力著有勞績遇缺題補等因康熙肆拾年叁月初伍日
題本月拾壹日奉

旨治河上諭及治河事宜著張鵬翮纂輯呈覽其進士舉人不必
遴選學習發往河工

康熙肆拾年肆月初肆日工部郎中王進楫傳奉

上諭對總河張鵬翮說保守高家堰第一要緊

康熙肆拾年肆月初陸日內閣中書殷德納捧

旨到臣內開康熙肆拾年叁月貳拾陸日大學士伊桑阿馬奇王

熙吳璵熊賜履張英學士法良辛保希福納傅紳范承烈王
九齡曹鑑倫等以九鄉議覆總河張鵬翮題為河員應照臺
灣之例叙用及懇免賠修錢糧等事毋庸議並分晰險要歲
修工程摺子奏請奉

旨據張鵬翮疏稱自碭山縣起至海口止湖河自石礪起至高家
堰六壩止運河自大墩起至淮關止自寶應起至更樓止自古
城起至仲莊間止俱屬第一險要工程運河自淮安起至涇河

止自灣頭起至瓜洲止自支河口起至猫兒窩迤北止中河自
劉老澗起至張家莊止俱屬其次險工等語但水性靡常倏爾
變遷歲修工程或變為險要險工淤塞即變為歲修督理此等
工程各官內亦有實心効力奉行者然不無隨衆塞責之員豈
可俱照臺灣之例一體叙用又疏稱九卿但知臺灣官員赴任
去任俱有冒涉風濤之險殊不知風濤之險河員不時冒涉等
語其臺灣官員定有歷俸叁年即行陞遷之例本意迥殊並非
僅為越海冒涉風濤起見張鵬翮未悉此意這事情前者九卿
題覆會議准行與九卿無涉朕以事關更改條例難以遽為准

行故遣人詢問此情節張鵬翮未嘗不知且河員現今俱係保
題從優補授若將河員照臺灣之例叙用必致更改條例如此
更改則吏兵工叁部條例俱致更改矣今將河員若照臺灣之
例叙用或仍補授河工員缺乎或陞補他省員缺乎若陞補他
省則河工歷練之員同時陞去獨剩新任之員有無裨益河工
之處未經議及即今河員已經歷任貳載其限叁年自任事之
日扣算或自今歲明歲扣算又疏稱伊行年伍拾叁歲再過叁
載能保尚在河工等語如此則張鵬翮後接任河臣焉知從前
官員賢否乃欲將河員遽為陞用此等情由並未聲明行令張

鵬翮將參部條例逐一再行詳細確議具奏仍著原遣中書前去將九卿議覆准行稿抄寫令前往中書賫去著張鵬翮看

康熙肆拾年伍月貳拾玖日為欽奉

上諭事接內閣中書李保柱捧

旨到臣內開康熙肆拾年伍月貳拾壹日大學士伊桑阿馬奇王熙吳璵熊賜履張英學士法良辛保傅紳范承烈王九齡曹鑑倫奉

旨高承爵奏報泗州盱眙地方水災著總河張鵬翮會同兩江總督阿山親行察勘具奏前高家堰閉塞陸壩時朕謂陸壩塞完後泗州盱眙等處必被水淹曾向九卿降有諭旨今陸壩方經閉完洪澤湖水長泛溢泗州盱眙等處城郭田畝果被水災高

家堰堤益覺危險朕為此時歷於懷且天災靡定萬一有異常風暴及地動雷震之事亦未可知倘若高家堰至於危險則揚州淮安等處皆被災矣朕為此日夜甚切憂懼高家堰堤作何保守堅固或另有修治善策著張鵬翮陳奏著差爾衙門中書一員前往

康熙肆拾年柒月貳拾伍日辰時准工部咨為欽奉

上諭事柒月初玖日奉

旨這堤岸修築防護著照議行前總河于成龍具疏欲將高堰陸壩堵塞蓄湖水以敵黃水疏通清口九鄉覆奏時朕以為高堰陸壩若行堵塞湖水泛漲泗州等州縣必被水淹沒曾諭九鄉迨遣范承勳等堵塞陸壩此非張鵬翮到任之後始行堵塞頃因巡撫高承爵題報泗州盱眙水災朕勅張鵬翮會同江南總督阿山踏勘情形將泗州盱眙泛溢之水設法修治作何賑濟蠲租令其奏聞又以洪澤湖水泛漲高家堰堤工似致危險朕

於此事時切躊躇若高家堰至於危險揚州淮安等處州縣皆被淹沒朕為此日夜殊切憂懼高家堰堤作何保守堅固更有何修治善策著張鵬翮陳奏曾遣人勅諭張鵬翮稱病未往泗州盱眙今具疏稱泗州盱眙水災自古已然即陸壩全開泗州亦被水災臣往泗州查勘水勢情形詢據土人云明季時有水災則泗州水災不係陸壩之閉按泗州誌載宋臣歐陽修先春亭記云民所素病而治其尤暴者莫大於淮則知淮之為暴於泗自古而已然矣今清口水流甚暢洪澤湖水漸消泗州水勢亦漸消且陸壩既閉之後水不東注高郵寶應興化泰州山陽

鹽城江都等州縣田地涸出民得耕種皆河伯効靈之所致等語朕著張鵬翮會同阿山將泗州盱眙泛漲之水作何設法築堤幫修或賑或蠲俱有益於災黎並非欲開高堰陸壩救泗州盱眙之民而令淮揚百姓罹於水災也朕念黃河運河關係國計民生參次看閱河工屢行簡任河臣修築堤岸每歲不惜數百萬帑金解發夏月雨水時晝夜憂慮不時遣人看視凡被水災截留漕米盡出倉糧賑濟者總為拯救災民並非止救泗州盱眙百姓之災而淮安揚州等處百姓聽其罹災之意也據張鵬翮謂泗州盱眙水災自古已然而淮揚水災亦素有也張鵬

翮奏稱陸壩既閉淮安揚州百姓俱免水災是但知淮揚地方豈獨不知有泗州盱眙天下之大亦并不知其為愚昧已至於極朕念四海一家凡有來朝見者必細詢兩澤田禾見有居住賀蘭山後公允木春來見問陝省河西田禾雨澤黃河水勢據允木春奏稱今歲自正月至陸月滴雨未降黃河水消貳丈有餘西地賴黃河水引入田畝耕種今年因河水小不但田禾即莖草亦未生發朕以陝省河西百姓作何拯救雖督撫未經具題已晝夜籌度張鵬翮與衆河官乃謂清口水出皆賴河伯効靈伊等効力所致此實因黃河水小清口之水倖而得出并非

伊等効力之所致也統一天下之主坐視災黎不為拯救張鵬翮既係讀書之人此果載之何記何書耶至張鵬翮題請議叙河員疏內明知朕有諭旨故稱九卿未晰今覽此奏又含怒具題意謂必有人阻撓果如此懸擬昏憤之極未有如張鵬翮者這事情又似鹽犯大賊孔文泰之案希圖好勝冒昧不顧將取罪戾著將朕諭旨及張鵬翮所奏一併刊刻於淮安揚州泗州盱眙等處徧行張掛令衆民觀看天下之人自有公論

康熙肆拾年玖月拾壹日准工部咨為題報開放陶莊引河
日期事玖月初壹日奉

旨張鵬翮奏稱開陶莊引河黃河水向北岍流去等語若黃河水
向北岍流離清口甚遠乘此時自范承勳所築挑水壩起寬長
加築堤岸過清口將黃河清口之水儘向下流再合為一處則
黃河之水可永無倒灌之虞朕先曾面勅過于成龍今在河官
員亦有知者著張鵬翮將此事問知道的官員詳明定議其修
堤所需錢糧即為估計所修之處著畫圖速行具奏此事甚為
緊要不得輕忽該部知道

康熙肆拾年拾壹月貳拾貳日中書永奇齋工部議覆總河
張鵬翮請將高郵州陸漫閘岍改築土堤一事於康熙肆拾
年拾壹月拾肆日大學士伊桑阿馬奇吳璵熊賜履學士辛
保傅紳來道常壽來福范承烈曹鑑倫等折本啟奏奉

旨陸漫閘西岍改築土堤內外鑲柴見今錢糧雖省但蘆柴易致
朽爛不能堅久貳叁年後又致重修張鵬翮在任時雖無可虞
若張鵬翮或離任或淮黃水漲有險危之處鑲柴工程朽爛豈
不更難著將這情由備寫差員前往張鵬翮處令其確議具奏

康熙肆拾壹年陸月拾捌日准內閣咨康熙肆拾壹年陸月
初叁日大學士伊桑阿馬奇張玉書吳璵熊賜履學士來道
常壽鐵圖紀爾塔渾王九齡曹鑑倫劉光美等奉

上諭朕因永定河南岍不時衝坍特旨令將南岍修築石堤者來
甚有裨益今黃河兩岍自徐州以下至於清口通行修築石堤
可否永遠有益若果有益見在庫帑不為缺少朕於錢糧一無
所惜修築此堤應於何處採取石料作何轉運約計幾年可以
告成著張鵬翮齊集河員詳議具奏

康熙肆拾壹年玖月貳拾肆日准工部咨為欽奉

上諭事康熙肆拾壹年玖月拾陸日奉

上諭諭吏戶兵工肆部朕念黃淮兩河為運道民生所繫屢次南

巡親臨閱視以疏濬修築之法指授河臣閉陸壩以束淮敵黃
通海口以引黃歸海比歲以來工程次第告竣修防漸有成效
昨年冬月河臣張鵬翮曾以河工善後之策及應修之處請朕
親閱指示茲當農事之隙減約從員輕裝南下自徐州一路循
視堤堰沿途皆設營幄不御屋廬日用所需悉已儲備經過地
方一切供張宜通行禁止倘有官吏藉名科派累及小民或指

稱預辦擅動庫帑察出定嚴加治罪地方大小文武官員與扈
從官員託言親舊私相餽遺及隨從人等有妄行生事者俱以
軍法從事閭閻百姓各事本業不須引避有懷挾私怨擅於駐
蹕處所告訐者一概不准仍照律治罪爾部即傳諭扈從人員
竝行各該督撫於所屬府州縣徧張告示務令通知以副朕體
恤民生至意特諭

康熙肆拾壹年拾月拾柒日准工部咨為恭報秋汛水勢情
形事康熙肆拾壹年玖月貳拾日奉

旨覽奏挑水壩築成逼黃河大溜直趨陶莊引河循北岸而行黃
水從大通口暢出海口極其深通淮水從清口暢流敵黃絕無
黃水倒灌之患高家堰堤工完固加謹防守經伏秋大漲俱獲
平穩運河水由涇河澗河人字芒稻等河分洩各處工程亦皆
保固知道了該部知道

康熙肆拾貳年正月貳拾陸日奉

上諭諭戶部朕甲子乙巳兩次南巡路經東省見民生豐裕士庶
共慶近來淮黃告成朕不辭遠涉減從輕行待旦而興夜分乃
寐再經齊魯存問民生休戚不及甲子乙巳朕深惜怛痼瘵之
在懷也若閭閻蓄積有餘即遇有水旱亦不致困苦今特加恩
蠲恤用弘愛養朕所經地方德州平原禹城齊河歷城長清恩
縣夏津武城館陶臨清清平博平堂邑聊城東阿陽穀壽張滕
嶧二十州縣康熙肆拾壹年未完地丁錢糧着通行蠲免濟南
府屬之海豐利津霑化兗州府屬之寧陽滋陽泗水金鄉單曹

鄆城曲阜費縣十二州縣去歲收成歉薄肆拾壹年未完錢糧亦通行免徵其去歲曾被水災者東平新泰蒙陰沂水沂州萊蕪六州縣康熙肆拾貳年錢糧以及肆拾壹年未完錢糧亦俱着全免其泰安郟城魚臺汶上嘉祥鉅野濟寧七州縣雖未成災肆拾壹年未完錢糧俱着蠲免肆拾貳年地丁錢糧着分叁年帶徵爾部即移文該撫董率各州縣有司詳慎奉行務令人沾實惠戶有餘藏以稱朕重期黎元殷阜之至意倘有不肖官吏侵蝕私徵者察出定從重治罪爾部即遵諭行特諭

康熙肆拾貳年貳月初貳日侍衛馬武傳

旨朕經過泰安州新泰縣蒙陰縣沂州郟城縣等處見民有饑色應急行賑救經過地方雖經賑濟蠲免錢糧但州縣倉穀年久朽爛無裨於散賑今着將總漕桑格漕米內貳萬石交與張鵬翮揀選賢能官員運至濟寧州兗州府等處州縣減價平糶有應賑之處即行賑濟亦交米貳萬石與桑格於泰安州一路散給又將收稅有力之官七員並發在京旗民犯罪降級贖罪人壹百名伊等俱照養蒙古例以所用之多寡分別議叙

康熙肆拾貳年貳月初貳日河道總督臣張鵬翮奉

上諭駱馬湖竹絡壩口門宜留

康熙肆拾貳年貳月初叁日河道總督臣張鵬翮奉

上諭看黃河磯嘴壩太短不能通溜今欲照永定河修長挑水壩

臣回奏永定河與黃河形勢不同黃河萬里而來勢大水深
磯嘴加長一遇長水易致冲壞河官慮賠修之苦不敢接長
又奉

上諭將一兩處試作長挑水壩即有冲壞免其賠補

康熙肆拾貳年貳月初叁日河道總督臣張鵬翻奉

上諭烟墩甚險雖有越堤必須保守縷堤此挑水壩應行建築

康熙肆拾貳年貳月初肆日辰時河道總督臣張鵬翮奉

上諭桃源烟墩至龍窩一帶堤工卑矮應行加高

康熙肆拾貳年貳月初肆日河道總督臣張鵬翮奉

上諭仲庄閘清水出口逼溜使南恐運口有碍應於陶家庄以下
楊家庄處着挑引河令中河之水從此出口於運口有益雖楊
家庄地勢低窪即使倒灌不過一二里清水仍然頂出着即相
度形勢估計具奏仲庄石閘暫停

康熙肆拾貳年貳月初伍日河道總督臣張鵬翮奉

上諭歸仁引河開放分洩洪澤湖水勢若黃水加長恐清口水弱

着將祥符閘下板堵閉草壩將五堡閘應酌量開放以助清水
之勢

康熙肆拾貳年貳月初伍日河道總督臣張鵬翮奉

上諭禹王臺沐水由沐陽入海其沐河淤墊之處應勘明疏浚

康熙肆拾貳年貳月初伍日永定河分司齊蘇勒欽奉

上諭朕看黃河險要地方應下挑水埽壩現今永定河朕親指示

挑水等工俱有裨益齊蘇勒爾遵照朕指授方畧式樣前往烟
墩玖里崗龍窩叁處修挑水壩數座試看有無裨益雖被冲沒
無妨工完之日着令該地方官盡心防守如有折陷不時修葺
將此旨意說與總河張鵬翮速派賢員令其多備物料夫匠於
朕回鑾之前完工需用錢糧齊蘇勒與爾無干不可經手工完
之日將用過錢糧數目記明具奏如遇挑汛水發即行傳止

康熙肆拾貳年貳月初柒日河道總督臣張鵬翮在邵伯更樓奉

上諭此地舊日被災形狀與今山東饑民無異豈朕今日觀此地安居景象而忘山東之饑民乎朕念運糧賑濟關係緊要乘今日順風爾作速回清江料理轉運截留漕糧差官前往散賑距揚州拾伍里沙壩橋河道情形朕自細閱回鑾時面說與爾知之

康熙肆拾貳年叁月初貳日河道總督臣張鵬翮奉

上諭王公堤關係運道民生最為緊要堤岸單薄椿工漸朽應再加幫以資捍禦不可因淤灘可恃而忽之也

康熙肆拾貳年叁月初叁日河道總督臣張鵬翮奉

上諭王家營對過鮑家營開引河洩黃漲之水以保障清江淮安

地方着即開挑兩岸築堤以衛民田

康熙肆拾貳年叁月初叁日河道總督臣張鵬翮奉

上諭高堰工程關係重大保守最為緊要朕今日乘舟由洪澤湖
閱視見有殘缺石工以葦草鑲填倘遇水發危險堪虞閱至陸
壩見新修石壩堅固方慰朕懷其殘缺石工着即興修乘水未
長之前完工以資捍禦

康熙肆拾貳年叁月初叁日河道總督臣張鵬翮奉

上諭開減水壩須於水緩之處不可迎溜以防奪河

康熙肆拾貳年叁月初叁日河道總督臣張鵬翮奉

上諭朕今見高家堰防險人員用候選縣丞經歷等微員不過例
監書辦出身家產微薄倘有疎忽干係不小須於候選職銜稍
大身家殷實者委其防險如此則彼知自愛身家又有選用之
望自然盡心防險有裨工程

康熙肆拾貳年叁月初叁日河道總督臣張鵬翮奉

上諭黃河逢灣取直開挑引河必須於對岸水淺之處築挑水壩

逼溜入引河方爲有益

康熙肆拾貳年叁月初肆日河道總督臣張鵬翔奉

上諭清口西壩乘此水淺再加長數丈有益

上諭
半路劉河流掃灣堤岸單薄應修挑水壩

康熙肆拾貳年叁月初肆日河道總督臣張鵬翮奉

康熙肆拾貳年叁月初捌日河道總督臣張鵬翮奉

上諭高家堰石工關係緊要必須嚴催早完

御製河臣箴癸未春日舟中書賜河臣張鵬翮

自古水患惟河為大治之有方民乃無害禹疏而九平成攸賴
降及漢唐決復未艾漸徙而南宋元滋溢今河昔河議不可一
昔止河防今兼漕法既弭其患復資其力矧此一方耕鑿失職
澤國波臣洞瘵已極肩茲鉅任曷容怠佚毋俾金隄潰於蟻穴
毋使田廬淪為蛟窟毋徒糜國帑而勢難終日毋虛動畚築而
功鮮覈實務圖先事盡利導策莫悔後時飾補直術勿即私而
背公勿辭勞而就逸惟潔清而自持兼集思而廣益則患無不
除績可光冊示我河臣敬哉以勗

御製覽淮黃告成詩

殷勤久矣理淮黃幾度風塵授治方九曲素稱天下險四來實
為兆民傷使清引濁須謹慎分勢開疏在不荒雖奏安瀾寬旰
食誠前善後奠金湯





缺卷3



